



Broj: 05/1-50-15-26-56-6/26  
Sarajevo, 2.2.2026.

Stamp: BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO  
PRIMLJENO: 02/02/2026  
Table:  
Organizaciona jedinica: 01/02-50-15-409/26  
Klasifikaciona oznaka: [blank]  
Redni broj: [blank]  
Broj priloga: [blank]

PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM  
DOM NARODA

**PREDMET: Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2025. godinu**

Poštovani,

U skladu sa članom 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine ("Službeni glasnik BiH" broj 36/08) i članom 9. Poslovnika o radu Nezavisnog odbora kao nezavisnog tijela policijske strukture BiH ("Službeni glasnik BiH" broj 93/09) Nezavisni odbor je na 56. sjednici održanoj 26. I. 2026. godine usvojio Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2025. godinu i dostavlja ga Parlamentarnoj skupštini BiH na usvajanje.

S poštovanjem,



**Prilog:** Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2025. godinu na bosanskom, hrvatskom i srpskom jeziku

Dostavljeno:

- Naslovu
- a/a



---

Broj: 05/1-50-15-26-56-5/26

Sarajevo, 26. 1. 2026.

## **IZVJEŠTAJ**

**o radu Nezavisnog odbora kao nezavisnog tijela policijske strukture**  
**Bosne i Hercegovine za 2025. godinu**

**Januar 2026. godine**

## SADRŽAJ

<b>POGLAVLJE I. UVODNE NAPOMENE .....</b>	<b>3</b>
<b>POGLAVLJE II. NADLEŽNOSTI NEZAVISNOG ODBORA .....</b>	<b>4</b>
<b>POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA.....</b>	<b>4</b>
<b>    Odjeljak A. Realizacija zadataka održavanjem redovnih sjednica Nezavisnog odbora...5</b>	
<b>    Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2025. ....</b>	<b>13</b>
<b>        1. Posjeta Graničnoj policiji BiH, 22. 10. 2025. ....</b>	<b>14</b>
<b>        2. Posjeta Direkciji za koordinaciju policijskih tijela BiH, 18. 11. 2025. ....</b>	<b>15</b>
<b>        3. Posjeta Državnoj agenciji za istrage i zaštitu, 8. 12. 2025. ....</b>	<b>17</b>
<b>POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA.....</b>	<b>19</b>
<b>POGLAVLJE V. ADMINISTRATIVNO-TEHNIČKA PODRŠKA RADU.....</b>	<b>19</b>
<b>POGLAVLJE VI. PREPORUKE I ZAKLJUČCI.....</b>	<b>19</b>

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 56. sjednici, održanoj 26. 1. 2026, usvojio i Parlamentarnoj skupštini Bosne i Hercegovine podnosi sljedeći

## **IZVJEŠTAJ**

### **o radu Nezavisnog odbora kao nezavisnog tijela policijske strukture Bosne i Hercegovine za 2025. godinu**

#### **POGLAVLJE I. UVODNE NAPOMENE**

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08) kao nezavisno tijelo Parlamentarne skupštine BiH. Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH („Službeni glasnik BiH“, broj 10/21).

Nezavisni odbor kao nezavisno tijelo policijske strukture BiH (u daljnjem tekstu: Nezavisni odbor) tijelo je Parlamentarne skupštine BiH s nadležnostima utvrđenim Zakonom o nezavisnim i nadzornim tijelima policijske strukture BiH („Službeni glasnik BiH“, broj 36/08) i Poslovníkom o radu Nezavisnog odbora („Službeni glasnik BiH“, broj 93/09). Na osnovu člana 5. st. (1) i (3) Zakona o nezavisnim i nadzornim tijelima policijske strukture BiH („Službeni glasnik BiH“, broj 36/08), Parlamentarna skupština BiH (Predstavnički dom na 16. sjednici, održanoj 3. 2. 2021, i Dom naroda na 15. sjednici, održanoj 10. 2. 2021) imenovala je novi saziv Nezavisnog odbora na mandat od četiri godine, i to:

1. Enes Obralića, predsjednik Nezavisnog odbora,
2. Miše Ćavar, prvi zamjenik predsjednika Nezavisnog odbora,
3. Uroš Pena, drugi zamjenik predsjednika Nezavisnog odbora (preminuo 2. 7. 2024),
4. Muhamed Mujakić, član Nezavisnog odbora,
5. Enes Bezdob, član Nezavisnog odbora,
6. Mate Miletić, član Nezavisnog odbora,
7. Nikola Džambas, član Nezavisnog odbora,
8. Darko Kremenović, član Nezavisnog odbora, i
9. Milan Stanić, član Nezavisnog odbora.

## **POGLAVLJE II. NADLEŽNOSTI NEZAVISNOG ODBORA**

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za: provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH, objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH odnosno Vijeću ministara BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavješćavanje o tome ministra sigurnosti BiH i Vijeća ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

## **POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA**

Osnovna nadležnost Nezavisnog odbora je provođenje procesa odabira kandidata za rukovodioce i zamjenike rukovodilaca policijskih tijela BiH te u vezi s tim objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH odnosno Vijeću ministara BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.

U vezi s navedenim, Nezavisni odbor je u 2025. godini proveo i u okvirima svoje nadležnosti okončao proceduru odabira kandidata za izbor zamjenika direktora Državne agencije za istrage i zaštitu.

Nezavisni odbor je u toku 2025. godine kontinuirano održavao komunikaciju s rukovodiocima policijskih agencija po svim bitnim pitanjima iz njihovog djelokruga, s posebnim naglaskom na aktivnosti koje su policijska tijela preduzimala u vezi s događanjima koja su izazivala veću medijsku pažnju.

Osim ove nadležnosti, Nezavisni odbor nadležan je i za predlaganje smjenjivanja rukovodilaca i zamjenika rukovodilaca policijskih tijela BiH, te iniciranje pokretanja disciplinskih postupaka protiv rukovodilaca policijskih agencija BiH.

#### **Odjeljak A. Realizacija zadataka održavanjem redovnih sjednica Nezavisnog odbora**

U izvještajnom periodu Nezavisni odbor održao je 11 redovnih i jednu hitnu sjednicu na kojima je razmatrano ukupno 68 tačaka i šest podtačaka dnevnog reda, usvojeno je pet zaključaka.

Broj i datum održavanja sjednice	Broj razmatranih tačaka dnevnog reda na sjednici	Broj prisutnih članova sjednicama Nezavisnog odbora	Broj članova koji nisu bili prisutni sjednicama Nezavisnog odbora	Zakazivane pa otkazivane sjednice iz objektivnih razloga
<b>45. sjednica</b> 28. 1. 2025. u 17.15	9	8		
<b>46. sjednica</b> - započeta 17. 2. 2025. u 17.15 - nastavak 17. 3. 2025. u 17.15	7	8		
<b>2. hitna sjednica -</b> 10. 3. 2025. u 17.15	1	8		
<b>47. sjednica</b> 15. 4. 2025. u 12.00	9	7	1	1. 4. 2025.
<b>48. sjednica</b> - započeta 15. 4. 2025. u 17.15 - nastavak 19. 5. 2025. u 17.15	8	8		1. 4. 2025.
<b>49. sjednica</b> 2. 6. 2025. u 17.15	6	8		
<b>50. sjednica</b> 3. 7. 2025. u 17.15	4	7	1	
<b>51. sjednica</b> 25. 8. 2025. u 17.15	5	8		
<b>52. sjednica</b> 23. 9. 2025. u 17.15	3	8		

<b>53. sjednica</b> 14. 10. 2025. u 17.15	3	8		
<b>54. sjednica</b> 18. 11. 2025. u 17.15	6	8		
<b>55. sjednica</b> 8. 12. 2025. u 17.15	7	8		

Nezavisni odbor je na sjednicama razmatrao pitanja iz svoje nadležnosti, od kojih izdvajamo sljedeće:

**Na 45. sjednici Nezavisnog odbora, održanoj 28. 1. 2025.**, razmatrane su prijave pristigle na Javni konkurs za provođenje procedure odabira kandidata za izbor zamjenika direktora Državne agencije za istrage i zaštitu. Konstatirano je da je blagovremeno pristiglo šest prijava. Nakon uvida u pristigle prijave, članovi Nezavisnog odbora konstatirali su da su se na javni konkurs prijavili sljedeći kandidati: Dragan Andrić, Igor Marić, Kristijan Suknjov, Đuro Knežević, Svevlad Hoffmann i Mario Pavlinović. Sve prijave su blagovremene i potpune te su prihvaćene u konkursnoj proceduri.

Dalje, jednoglasno je usvojen Izvještaj o posjeti članova Nezavisnog odbora Direkciji za koordinaciju policijskih tijela BiH koja je upriličena 12. 12. 2024, a u kojoj su bili: Miše Ćavar, prvi zamjenik predsjednika Nezavisnog odbora, Enes Bezdob i Milan Stanić, članovi Nezavisnog odbora. Jednoglasno je usvojen i Izvještaj o posjeti članova Nezavisnog odbora Državnoj agenciji za istrage i zaštitu koja je upriličena 17. 12. 2024, a u kojoj su bili: Mate Miletić i Milan Stanić, članovi Nezavisnog odbora.

Također, jednoglasno je usvojen i Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2024. godinu koji je, u skladu s članom 7. stav (1) Zakona o nezavisnim i nadzornim tijelima policijske strukture Bosne i Hercegovine i članom 9. Poslovnika o radu Nezavisnog odbora kao nezavisnog tijela policijske strukture BiH, prosljeđen Parlamentarnoj skupštini BiH na usvajanje.

Razmatrana je predstavka D. B, nakon čega je usvojen zaključak da se ona prosljedi direktoru Državne agencije za istrage i zaštitu na izjašnjenje o navodima iz predstavke, a radi daljnjeg postupanja Nezavisnog odbora.

Ramatrana je predstavka S. S, nakon čega je jednoglasno konstatirano da Nezavisni odbor nije stvarno nadležan za rješavanje predstavke te da se ona stavi *ad acta*.

**Na 46. sjednici Nezavisnog odbora, održanoj 17. 2. 2025. i 17. 3. 2025.**, razmatran je dopis Ministarstva sigurnosti BiH, a u vezi sa Izvještajem o usklađenosti Bosne i Hercegovine s

preporukama GRECO-a u petom krugu evaluacije. Što se tiče analize realizacije preporuka GRECO-a koje je ovaj odbor razmatrao prilikom ranijih izvještaja o usklađenosti Bosne i Hercegovine s preporukama GRECO-a u petom krugu evaluacije, predsjednik Nezavisnog odbora Enes Obralića predložio je da Nezavisni odbor donese određeni zaključak koji bi se odnosio na realizaciju predloženih preporuka. Ta preporuka odnosi se na objavljivanje biografija svih kandidata čije su prijave prihvaćene u konkursnom postupku, a koji provodi Nezavisni odbor. Jednoglasno je usvojen sljedeći

### **ZAKLJUČAK**

Nezavisni odbor konstatira da je nakon Izvještaja o usklađenosti BiH s preporukama GRECO-a u petom krugu evaluacije realizirao preporuke GRECO-a iz Izvještaja. Također, iz Izvještaja koji su uslijedili Nezavisni odbor realizira sve preporuke GRECO-a koje nisu u suprotnosti s domaćim zakonodavstvom, a odnose se na sve kandidate u postupku provođenja procesa izbora kandidata za rukovodioce i zamjenike rukovodilaca policijskih tijela BiH. U vezi s tim, realizirana je preporuka koja se odnosi na maksimalno trajanje intervjua do 30 minuta i na audiosnimanje intervjua, a realizirat će se preporuka koja se odnosi na objavljivanje biografija svih kandidata čije su prijave prihvaćene u konkursnom postupku, počev od javnog konkursa koji je u toku (Javni konkurs za provođenje procedure odabira kandidata za izbor zamjenika direktora Državne agencije za istrage i zaštitu).

Dalje, razmatrana je predstavka/zahtjev Svelada Hoffmanna za isključenje kandidata iz konkursne procedure za izbor zamjenika direktora Državne agencije za istrage i zaštitu, nakon čega je usvojen sljedeći

### **ZAKLJUČAK**

Zahtjev Svelada Hoffmanna odbija se kao neosnovan zato što je Nezavisni odbor jednoglasno na 45. sjednici donio odluku da se prijave svih šest kandidata prijavljenih na Javni konkurs za provođenje procedure odabira kandidata za izbor zamjenika direktora Državne agencije za istrage i zaštitu prihvataju.

S obzirom na to da je Zahtjev Svelada Hoffmanna upućen i na adresu oba doma Parlamentarne skupštine BiH, zaključeno je i da se odgovor Sveladu Hoffmannu također uputi Domu naroda Parlamentarne skupštine BiH i Predstavničkom domu Parlamentarne skupštine BiH.

Razmatrana je i Molba za postupanje po Zakonu o slobodi pristupa informacijama na nivou institucija BiH koju je uputio Svevlad Hoffmann, a kojom traži da mu se omogući uvid u dokumentaciju koju su kandidati za zamjenika direktora Državne agencije za istrage i zaštitu dostavili Nezavisnom odboru koji provodi proceduru Javnog konkursa za provođenje procedure odabira kandidata za izbor zamjenika direktora Državne agencije za istrage i zaštitu. Nezavisni odbor jednoglasno je zaključio da zahtjev nije osnovan. U prilog tome ide činjenica da su na veb-stranici Parlamentarne skupštine BiH (Druga parlamentarna tijela / Nezavisni odbor / Ostale aktivnosti), a u skladu s preporukama GRECO-a, dostupne biografije svih kandidata prijavljenih na Javni konkurs za provođenje procedure odabira kandidata za izbor zamjenika direktora Državne agencije za istrage i zaštitu te Nezavisni odbor u predmetnom zahtjevu ne nalazi osnovanost zahtjeva s obzirom na to da su informacije već dostupne javnosti.

Razmatrana je predstavka Ž. G, nakon čega je usvojen zaključak da se ona prosljedi direktoru Direkcije za koordinaciju policijskih tijela BiH na izjašnjenje o navodima iz predstavke, a radi daljnjeg postupanja Nezavisnog odbora.

**Na 2. hitnoj sjednici Nezavisnog odbora, održanoj 10. 3. 2025,** razmatrano je aktuelno stanje sigurnosti u Bosni i Hercegovini, kao i pitanje poslanika u Predstavničkom domu Parlamentarne skupštine BiH Jasmina Emrića. Na ovu sjednicu su pozvani i odazvali joj se direktori i zamjenici direktora policijskih agencija BiH kako bi članovima Nezavisnog odbora odgovorili na određena pitanja u vezi s aktuelnom sigurnosnom situacijom u Bosni i Hercegovini: Darko Ćulum, direktor Državne agencije za istrage i zaštitu, Enes Karić, direktor Direkcije za koordinaciju policijskih tijela BiH, Đuro Knežević i Goran Amidžić, zamjenici direktora Direkcije za koordinaciju policijskih tijela BiH, Mirko Kuprešaković, direktor Granične policije BiH, te Ensad Korman, zamjenik direktora Granične policije BiH. Jednoglasno je utvrđen odgovor na poslaničko pitanje koji je u skladu s članom 171. stav (2) Poslovnika Predstavničkog doma Parlamentarne skupštine BiH dostavljen podnosiocu poslaničkog pitanja.

**Na 47. sjednici Nezavisnog odbora, održanoj 15. 4. 2025,** razmatran je zahtjev Darka Ćuluma za razrješenje dužnosti direktora Državne agencije za istrage i zaštitu, nakon čega je jednoglasno zaključeno da Nezavisni odbor nije nadležan za rješavanje po predmetnom zahtjevu te s obzirom da su ga dobili i nadležni organi, prima se k znanju i stavlja *ad acta*.

Dalje, razmatran je dopis predsjedavajuće Vijeća ministara BiH Borjane Krišto upućen predsjedniku Nezavisnog odbora u kojem ga poziva da u okvirima odgovornosti i obaveza utvrđenih Poslovníkom o radu Nezavisnog odbora hitno, u što kraćem roku, sazove sjednicu

Nezavisnog odbora na kojoj će se završiti procedura odabira kandidata za rang-listu za zamjenika direktora Državne agencije za istrage i zaštitu. Dopis je jednoglasno primljen k znanju i stavljen *ad acta*. Razmatrana je i urgencija zamjenika ministra sigurnosti BiH Ivice Bošnjaka da Nezavisni odbor hitno, bez odgađanja, okonča proceduru odabira zamjenika direktora Državne agencije za istrage i zaštitu i dostavi listu uspješnih kandidata Ministarstvu sigurnosti BiH kako bi se mogao proslijediti prijedlog za imenovanje Vijeću ministara BiH. Dopis je jednoglasno primljen k znanju i stavljen *ad acta*.

Na istoj sjednici obavljen je intervju s kandidatima koji su se prijavili i koji ispunjavaju uslove Javnog konkursa za provođenje procedure odabira kandidata za izbor zamjenika direktora Državne agencije za istrage i zaštitu. Na intervju je, u skladu s članom 13. stav (1) Poslovnika o radu Nezavisnog odbora kao nezavisnog tijela policijske strukture BiH, pozvano šest kandidata koji su se prijavili i koji ispunjavaju uslove Javnog konkursa za provođenje procedure odabira kandidata za izbor zamjenika direktora Državne agencije za istrage i zaštitu: Dragan Andrić, Svevlad Hoffmann, Đuro Knežević, Igor Marić, Mario Pavlinović i Kristijan Suknjov.

Intervjuu su se odazvala četiri kandidata: Dragan Andrić, Đuro Knežević, Igor Marić i Kristijan Suknjov.

U daljnjem toku sjednice razmatrano je i izjašnjenje Direkcije za koordinaciju policijskih tijela BiH na prethodno dostavljenu predstavku, nakon čega je jednoglasno usvojen zaključak da se predstavka, kao i izjašnjenje rukovodstva Direkcije za koordinaciju policijskih tijela BiH, dostave Tužilaštvu BiH na nadležnost i daljnje postupanje.

**Na 48. sjednici Nezavisnog odbora, održanoj 15. 4. 2025. i 19. 5. 2025,** članovi Nezavisnog odbora utvrdili su konačnu rang-listu uspješnih kandidata prijavljenih na Javni konkurs za provođenje procedure odabira kandidata za izbor zamjenika direktora Državne agencije za istrage i zaštitu koja je, u skladu s članom 13. stav (2) Poslovnika o radu Nezavisnog odbora kao nezavisnog tijela policijske strukture BiH, dostavljena ministru sigurnosti BiH na daljnje postupanje.

#### **RANG-LISTA**

##### **uspješnih kandidata za poziciju zamjenika direktora Državne agencije za istrage i zaštitu**

1. Dragan Andrić (97,85 bodova)
2. Đuro Knežević (55 bodova)

Razmatrano je i pitanje poslanika u Predstavničkom domu Parlamentarne skupštine BiH Jasmina Emrića, nakon čega je jednoglasno utvrđen odgovor koji je dostavljen podnosiocu poslaničkog pitanja.

Razmatrano je i izjašnjenje Državne agencije za istrage i zaštitu BiH na prethodno dostavljenu predstavku, nakon čega je jednoglasno primljeno k znanju.

Također, razmatrana je predstavka N. M. Z, nakon čega je donesen zaključak da se ona proslijedi direktoru Granične policije BiH na izjašnjenje o navodima iz predstavke, a radi daljnjeg postupanja Nezavisnog odbora.

Razmatrane su i predstavke S. S, nakon čega je jednoglasno konstatirano da Nezavisni odbor nije stvarno nadležan za rješavanje predstavki te da se one stave *ad acta*.

**Na 49. sjednici Nezavisnog odbora, održanoj 2. 6. 2025,** razmatran je Zahtjev Sindikata Državne agencije za istrage i zaštitu u kojem traže da Nezavisni odbor hitno okonča proceduru izbora zamjenika direktora Državne agencije za istrage i zaštitu, u skladu s važećim propisima, i da prijedlog dostavi Ministarstvu sigurnosti BiH, nakon čega je jednoglasno utvrđen odgovor koji je upućen Sindikatu Državne agencije za istrage i zaštitu.

Razmatrana je predstavka M. B, nakon čega je jednoglasno donesen zaključak da se ona proslijedi Nezavisnom odboru Skupštine Kantona Sarajevo na daljnje postupanje.

Razmatrane su i predstavke S. S, nakon čega je jednoglasno konstatirano da Nezavisni odbor nije stvarno nadležan za rješavanje predstavki te da se one stave *ad acta*.

**Na 50. sjednicu Nezavisnog odbora, održanu 3. 7. 2025,** pozvani su Mirko Kuprešaković, direktor Granične policije BiH, i Ensad Korman, zamjenik direktora Granične policije BiH, kako bi s članovima Nezavisnog odbora razgovarali o trenutnom stanju u Graničnoj policiji BiH, o realiziranim aktivnostima, kao i o aktivnostima planiranim za naredni period.

Razgovarali su o trenutnom stanju u Graničnoj policiji BiH, rezultatima koje su ostvarili u proteklom periodu, a posebno kada su u pitanju organizirani kriminal, borba protiv terorizma, trgovina ljudima i narkoticima, ilegalne migracije, zatim o problemima s kojima se susreću u radu, kadrovskoj i nacionalnoj popunjenosti i prijemu novih policijskih službenika, o Zakonu o policijskim službenicima BiH, Zakonu o graničnoj kontroli te o saradnji s FRONTEX-om. Razgovarali su i o saradnji s Tužilaštvom BiH, saradnji s drugim policijskim agencijama u Bosni i Hercegovini, kao i saradnji rukovodstva Granične policije BiH. Na upit predsjednika Nezavisnog odbora da li se u prethodnom periodu dešavalo da preko graničnih prijelaza prelaze VIP ličnosti za kojima se traga, direktor je odgovorio da takvih prelazaka preko

graničnih prijelaza nije bilo te da će, ako se to dogodi, granična policija postupiti po zakonu bez obzira na to da li je riječ o VIP ličnosti ili bilo kojem drugom građaninu.

Član Nezavisnog odbora Muhamed Mujakić u razgovoru s rukovodstvom Granične policije BiH zamolio je da, iako zna da to nije u njihovoj nadležnosti, u saradnji s Upravom za indirektno oporezivanje BiH, nađu način da zastave koje su istaknute na graničnim prijelazima, a koje su dotrajale i pohabane, zamijene novim.

U daljnjem toku sjednice razmatrano je i izjašnjenje Granične policije BiH na prethodno dostavljenu predstavku, nakon čega je jednoglasno usvojen sljedeći

### ZAKLJUČAK

Nezavisni odbor razmatrao je izjašnjenje direktora Granične policije BiH povodom predstavke N. M. Z. i dogovorio da će tim koji će formirati Nezavisni odbor prilikom naredne posjete Graničnoj policiji BiH dodatno nastojati razjasniti određena pitanja koja se navode u predstavi.

**Na 51. sjednicu Nezavisnog odbora, održanu 25. 8. 2025,** pozvani su Enes Karić, direktor Direkcije za koordinaciju policijskih tijela BiH, i Goran Amidžić, zamjenik direktora Direkcije za koordinaciju policijskih tijela BiH, a kako bi s članovima Nezavisnog odbora razgovarali o trenutnom stanju u Direkciji za koordinaciju policijskih tijela BiH, o realiziranim aktivnostima, kao i o aktivnostima planiranim za naredni period. Đuro Knežević, zamjenik direktora Direkcije za koordinaciju policijskih tijela BiH, blagovremeno je opravdao svoje odsustvo.

Razgovarali su o trenutnom stanju u Direkciji za koordinaciju policijskih tijela BiH, aktivnostima koje su provodili i koje imaju namjeru provoditi u narednom periodu, kadrovskoj i nacionalnoj popunjenosti, unapređenju, odnosno činovanju policijskih službenika, izmjeni Odluke o osobama i objektima koji se štite, o novom Zakonu o policijskim službenicima BiH, o problemu trajnog smještaja Direkcije za koordinaciju policijskih tijela BiH, saradnji s drugim policijskim agencijama u BiH. Rukovodstvo Direkcije za koordinaciju policijskih tijela BiH upoznalo je članove Nezavisnog odbora o tome kako je sa sigurnosnog aspekta proteklo obilježavanje 11. jula u Srebrenici.

Dalje, razmatrano je obavještenje o odustajanju od zahtjeva za razrješenje Darka Ćuluma, direktora Državne agencije za istrage i zaštitu. Enes Bezdob, član Nezavisnog odbora, istaknuo je da je neprihvatljivo da se Darko Ćulum, direktor Državne agencije za istrage i zaštitu, šest mjeseci nakon što je podnio zahtjev za razrješenje predomisli, a da u međuvremenu obavlja neke druge poslove, te predložio da se Vijeću ministara BiH uputi

zahtjev za njegovu smjenu. Predsjednik Enes Obralića podržao je ovaj prijedlog podsjećajući na odredbe iz člana 68. Zakona o upravi Bosne i Hercegovine. Također, član Nezavisnog odbora Muhamed Mujakić saglasio se s prijedlogom za donošenje zaključka kojim se predlaže smjena Darka Ćuluma s pozicije direktora Državne agencije za istrage i zaštitu. Nakon rasprave i ostalih članova Nezavisnog odbora, predsjednik je stavio na glasanje prijedlog Enesa Bezdroba da se Vijeću ministara BiH uputi prijedlog za smjenu Darka Ćuluma, direktora Državne agencije za istrage i zaštitu. S tri glasa „za“, jednim „protiv“ i četiri glasa „suzdržan“, prijedlog nije dobio potrebnu većinu.

**Na 52. sjednici Nezavisnog odbora, održanoj 23. 9. 2025,** dogovoreni su timovi koji će u skladu s Planom rada Nezavisnog odbora kao nezavisnog tijela policijske strukture BiH za 2025. godinu, u oktobru 2025. posjetiti Graničnu policiju BiH, u novembru 2025. Direkciju za koordinaciju policijskih tijela BiH te u decembru 2025. Državnu agenciju za istrage i zaštitu.

**Na 53. sjednici Nezavisnog odbora, održanoj 14. 10. 2025,** razmatrane su eventualne izmjene i dopune Poslovnika o radu Nezavisnog odbora kao nezavisnog tijela policijske strukture Bosne i Hercegovine, nakon čega je jednoglasno usvojen sljedeći

## ZAKLJUČAK

Potrebno je da do kraja kalendarske godine svaki član Nezavisnog odbora na narednim sjednicama iskoristi mogućnost i predloži određene izmjene ili dopune Poslovnika o radu Nezavisnog odbora kao nezavisnog tijela policijske strukture BiH, a što bi svakako bilo u sklopu planskih aktivnosti Nezavisnog odbora za 2026. godinu.

**Na 54. sjednici Nezavisnog odbora, održanoj 18. 11. 2025,** dogovoreno je da će rad na prijedlozima izmjena i dopuna Poslovnika o radu Nezavisnog odbora kao nezavisnog tijela policijske strukture Bosne i Hercegovine biti nastavljen i na narednim sjednicama Nezavisnog odbora.

Razmatrana je predstavka/pritužba policijskog službenika Direkcije za koordinaciju policijskih tijela BiH Ž. G. dostavljena od Direkcije za koordinaciju policijskih tijela BiH, nakon čega je jednoglasno donesen zaključak da se predstavka proslijedi direktoru Direkcije za koordinaciju policijskih tijela BiH na izjašnjenje o navodima iz predstavke, a radi daljnjeg postupanja Nezavisnog odbora.

Jednoglasno je usvojen Izvještaj o posjeti članova Nezavisnog odbora Graničnoj policiji BiH koja je upriličena 22. 10. 2025, a u kojoj su bili: Enes Obralića, predsjednik Nezavisnog odbora, i Miše Ćavar, prvi zamjenik predsjednika Nezavisnog odbora.

**Na 55. sjednici Nezavisnog odbora, održanoj 8. 12. 2025,** a prilikom razmatranja izmjena i dopuna Poslovnika o radu Nezavisnog odbora kao nezavisnog tijela policijske strukture Bosne i Hercegovine, a imajući u vidu da se prijedlozi članova Nezavisnog odbora odnose prvenstveno na nadležnost Nezavisnog odbora, jednoglasno je usvojen sljedeći

### **ZAKLJUČAK**

S obzirom na to da bi se izmjene i dopune Poslovnika o radu Nezavisnog odbora odnosile na nadležnosti Nezavisnog odbora, smatramo da je potrebno prije izmjena i dopuna Poslovnika o radu Nezavisnog odbora promijeniti Zakon o nezavisnim i nadzornim tijelima policijske strukture BiH.

Dalje, jednoglasno je usvojen Prijedlog plana rada Nezavisnog odbora kao nezavisnog tijela policijske strukture Bosne i Hercegovine za 2026. godinu koji je, u skladu s članom 7. stav (1) tačka b) Zakona o nezavisnim i nadzornim tijelima policijske strukture u Bosni i Hercegovini i članom 9. Poslovnika o radu Nezavisnog odbora kao nezavisnog tijela policijske strukture BiH prosljeđen Parlamentarnoj skupštini BiH.

Jednoglasno je usvojen i Izvještaj o posjeti članova Nezavisnog odbora Direkciji za koordinaciju policijskih tijela BiH koja je upriličena 18. 11. 2025, a u kojoj su bili: Mate Miletić, Enes Bezdob i Milan Stanić, članovi Nezavisnog odbora.

#### **Odjeljak B. Realizacija zadataka održavanjem sastanaka s rukovodiocima policijskih tijela BiH, u skladu s Planom rada za 2025. godinu**

Planom rada Nezavisnog odbora za 2025. godinu predviđeno je održavanje pojedinačnih sastanaka s rukovodstvom Direkcije za koordinaciju policijskih tijela BiH, Državne agencije za istrage i zaštitu i Granične policije BiH. Cilj ovih sastanaka je uvid u rad i upoznavanje s problemima s kojima se u radu susreću rukovodioci policijskih agencija BiH. Nezavisni odbor obavlja zadatke iz svoje nadležnosti i putem izvještaja o radu koji dostavlja Parlamentarnoj skupštini BiH na razmatranje i usvajanje informira je o problemima u radu policijskih agencija BiH iz svoje nadležnosti.

Nezavisni odbor je u 2025. godini, u skladu s članom 18. Poslovnika o radu Nezavisnog odbora i Planom rada Nezavisnog odbora za 2025. godinu, obavio sljedeće posjete:

Posjeta	Datum posjete
Graničnoj policiji BiH	22. 10. 2025.
Direkciji za koordinaciju policijskih tijela BiH	18. 11. 2025.
Državnoj agenciji za istrage i zaštitu	8. 12. 2025.

### **1. Granična policija BiH, 22. 10. 2025.**

Sastanak članova Nezavisnog odbora kao nezavisnog tijela policijske strukture BiH s direktorom Granične policije BiH Mirkom Kuprešaković, zamjenikom direktora Granične policije Ensadom Kormanom i pomoćnikom direktora za organizaciju i operacije Veljkom Lazićem održan je 22. 10. 2025. U ime Nezavisnog odbora sastanku su prisustvovali: Enes Obralića, predsjednik Nezavisnog odbora, i Miše Ćavar, prvi zamjenik predsjednika Nezavisnog odbora, te Ivana Lovrić, sekretarka Nezavisnog odbora.

Direktor je istaknuo da je najveći problem ove policijske agencije nedostatak velikog broja policijskih službenika. Usvajanjem novog Pravilnika o unutrašnjoj organizaciji i sistematizaciji radnih mjesta u Graničnoj policiji BiH trenutno nedostaje 1.208 policijskih službenika. Od početka njegovog mandata započeto je i okončano 36 internih i javnih konkursa u kojima je unaprijeđeno ili primljeno u radni odnos oko 800 kandidata. U narednom periodu planirano je da se raspiše konkurs za novih 150 policijskih službenika. Istaknuo je da je veliki interes za ova radna mjesta. Plan je da se svakih deset mjeseci, koliko traje školovanje kadeta, primi novih 150 policijskih službenika kako bi se barem donekle nadomjestio njihov veliki nedostatak.

Također, direktor je članovima Nezavisnog odbora ponovo istaknuo da je jedna od najboljih mogućnosti da se smanji broj nedostajućih policijskih službenika izmjena i dopuna Zakona o policijskim službenicima BiH gdje bi se predvidjela mogućnost da policijskom službeniku koji je ispunio jedan od uslova za odlazak u penziju direktor omogući produženje radnog vijeka na određeni period na njegov zahtjev i uz lječarski pregled. Ovaj prijedlog su podržale i druge policijske agencije na nivou BiH. Trenutno je taj prijedlog u Ministarstvu sigurnosti BiH.

Što se tiče saradnje s FRONTEX-om (Agencija za evropsku graničnu i obalnu stražu), direktor je istakao da do 4. 11. 2025. svi pripadnici FROTEX-a trebaju stići na granične prijelaze u BiH. Kako bi se poboljšala saradnja s pripadnicima FRONTEX-a, oko 60 policijskih službenika Granične policije BiH pohada obuku stranih jezika, a sve u svrhu lakše komunikacije.

Direktor je istaknuo i to da je s Direkcijom za koordinaciju policijskih tijela BiH dogovoreno da se krene u proces izmjena Zakona o međunarodnoj pravnoj pomoći u krivičnim stvarima u dijelu koji se odnosi na ekstradiciju. Naime, u Zakonu je propisano da realizaciju izručenja, tj. transport i predaju lica obavlja Granična policija BiH, a dogovor je da u budućem periodu te poslove preuzme Direkcija za koordinaciju policijskih tijela BiH. Trenutno je i taj prijedlog na Vijeću ministara BiH.

Rukovodstvo Granične policije BiH je članove Nezavisnog odbora upoznao i s određenim planovima koje imaju za naredni period. Naime, pokrenuli bi inicijativu da se policijskom službeniku po automatizmu svake četiri godine dodijeli čin, naravno ispunjenjem određenih kriterija koji bi bili regulirani Pravilnikom o kriterijima za unapređenje. Takva praksa je u većini zemalja Evropske unije (Slovenija, Italija, Hrvatska, Austrija, Češka).

## **2. Direkcija za koordinaciju policijskih tijela, 18. 11. 2025.**

Sastanak članova Nezavisnog odbora kao nezavisnog tijela policijske strukture BiH s direktorom Direkcije za koordinaciju policijskih tijela BiH Enesom Karićem, zamjenicima direktora Direkcije za koordinaciju policijskih tijela BiH Đurom Kneževićem i Goranom Amidžićem održan je 18. 11. 2025. u prostorijama Direkcije za koordinaciju policijskih tijela BiH. U ime Nezavisnog odbora sastanku su prisustvovali: Mate Miletić, Enes Bezdrob i Milan Stanić, članovi Nezavisnog odbora, te Ivana Lovrić, sekretarka Nezavisnog odbora.

Direktor Direkcije za koordinaciju policijskih tijela BiH (u daljnjem tekstu: Direkcija) na početku sastanka upoznao je članove Nezavisnog odbora o značajnim aktivnostima koje su imali u proteklom periodu, kao i o problemima s kojima se susreću u radu.

Istaknuo je da Direkcija pokušava okončati ovu kalendarsku godinu bez velikog opterećenja na sopstveni budžet. Zbog neusvajanja državnog budžeta nisu realizirali neke javne nabavke, ali ako bi bio usvojen ubrzo, mogli bi realizirati neke manje kao što je nabavka policijskih i specijalističkih uniformi.

Direktor je istaknuo da je trenutno 50 kadeta na školovanju u Agenciji za školovanje i stručno usavršavanje kadrova u Mostaru koji će s 31. 5. 2026. biti operativni policijski službenici Direkcije. Ono što je važno istaknuti jeste da su probni rad s devet mjeseci smanjili na sedam mjeseci i tri sedmice.

Trenutno je u toku konkursna procedura za prijem novih 70 policijskih službenika u činu policajac. Istaknuo je da zaključno s 31. 12. 2025. šest policijskih službenika u činu policajac ide u penziju, a sljedeće godine po projekciji u penziju ide 147 policijskih službenika. Kako bi se smanjio broj nedostajućih policijskih službenika, direktor je istaknuo da je jedna od najboljih mogućnosti izmjena i dopuna Zakona o policijskim službenicima BiH kojim bi se predvidjela mogućnost da policijskom službeniku koji je ispunio jedan od uslova za odlazak u penziju direktor omogući produženje radnog vijeka na određeni period na njegov zahtjev i uz ljekarski pregled. Ovaj prijedlog su podržale i druge policijske agencije na nivou Bosne i Hercegovine. Trenutno je taj prijedlog u Ministarstvu sigurnosti BiH.

Što se tiče unapređenja policijskih službenika, direktor je istaknuo da su uspostavili kontinuitet činovanja te su u proteklom periodu putem internih konkursa unaprijedili oko 250 policijskih službenika. Ono što je bitno istaknuti jeste da nije bilo ni jedne žalbe u tim postupcima. Osim unapređenja policijskih službenika, napredovalo je i 17 državnih službenika u Direkciji.

Dalje, direktor je istaknuo da su u proteklom periodu imali problem smještaja regionalnog ureda u Tuzli. Naime, smještaj u kojem su bili zajedno s Državnom agencijom za istrage i zaštitu postao je neuslovan. Raspisali su javni oglas za najam prostorija na koji su se javile Željeznice Federacije s kojima su i sklopili ugovor o najmu. Poseban odjeljak zgrade Željeznica Federacije su zatvorili i prilagodili potrebama Direkcije te iz svojih sredstava sredili i okrećili. Po ugovoru su dobili i četiri parking mjesta te prostor za policijsku kućicu. Mjesečni iznos za najam prostorija Direkcije je 1.800 KM.

Kada je Centralni ured u Sarajevu u pitanju, direktor je istaknuo da su više puta upućivali dopise prema Vijeću ministara BiH za rješavanje trajnog smještaja Direkcije. Tri su moguća scenarija: prvi je kupovina zemljišta i izgradnja objekta iz temelja, drugi je pronalazak novog objekta za kupovinu, a treći je etažiranje objekta u kojem se sada nalaze i da se tu trajno smjeste. Trenutno koriste 6000 m<sup>2</sup> prostora. S obzirom na to da Direkcija osigurava Memorijalni centar Potočari, u pregovorima su da se i tamo riješi smještaj policijskih službenika, jer su trenutno u kontejnerima.

U razgovoru s članovima Nezavisnog odbora direktor je istaknuo da ima izuzetno dobru saradnju s drugim policijskim agencijama u BiH.

### **3. Državna agencija za istrage i zaštitu, 8. 12. 2025.**

Sastanak članova Nezavisnog odbora kao nezavisnog tijela policijske strukture BiH s direktorom Državne agencije za istrage i zaštitu Darkom Ćulumom, zamjenikom direktora Državne agencije za istrage i zaštitu Draganom Andrićem i načelnikom Kriminalističko-istražnog odjela (KIO) Suadom Hasanovićem održan je 8. 12. 2025. u prostorijama Državne agencije za istrage i zaštitu. U ime Nezavisnog odbora sastanku su prisustvovali: Muhamed Mujakić, Nikola Džambas i Milan Stanić, članovi Nezavisnog odbora, te Ivana Lovrić, sekretarka Nezavisnog odbora.

Direktor Državne agencije za istrage i zaštitu Darko Ćulum na početku je ukratko upoznao članove Nezavisnog odbora o realiziranim aktivnostima, aktivnostima koje su planirane za naredni period, kao i o problemima s kojima se susreću u radu. Napomenuo je kako je za njega, a i samu agenciju, prethodni period bio veoma turbulentan.

Upoznao je članove Nezavisnog odbora o podacima u vezi s pokretanjem istraga i istraga koje su već pokrenute. Istaknuo je da 30-ak predmeta na Tužilaštvu BiH čeka međunarodno pravnu pomoć kako bi započeli istragu, jer je dogovor s Tužilaštvom BiH da se bez nje ne kreće u istragu. Tužilaštvu BiH će uskoro biti proslijeđeno 15-ak predmeta, a koji su proizašle iz SKY i ANUM aplikacije.

Govorio je o aktivnostima koje provode zajedno s policijskim agencijama unutar BiH i policijskim agencijama izvan BiH. Istaknuo je da je saradnja s policijskim agencijama unutar BiH izuzetno dobra.

Direktor je informirao članove Nezavisnog odbora da je u toku priprema aktivnosti u vezi s povratkom državljana BiH iz Sirije i Iraka. Naime, tim od šest policijskih službenika Državne agencije za istrage i zaštitu, u saradnji sa Sjedinjenim Američkim Državama, putuje u Siriju i Irak kako bi identificirali državljane BiH koji se tamo nalaze i osigurali njihov povratak. Riječ je o otprilike 125 osoba različitih profila od kojih su neki i u zatvoru. Sve policijske agencije u BiH dale su podršku Državnoj agenciji za istrage i zaštitu jer je ova aktivnost veoma opasan i rizičan posao.

Prezentirana je popunjenost odnosno djelimična popunjenost Državne agencije za istrage i zaštitu. Trenutno nedostaje 176 policijskih službenika, a 113 u činu policajac, ali to ne

predstavlja problem u njihovom postupanju. Na školovanju u Agenciji za školovanje i stručno usavršavanje kadrova u Mostaru je u ovom trenutku V. klasa kadeta.

Direktor je članovima Nezavisnog odbora ponovo istaknuo da je jedna od najboljih mogućnosti da se smanji broj nedostajućih policijskih službenika izmjena i dopuna Zakona o policijskim službenicima BiH gdje bi se predvidjela mogućnost da policijskom službeniku koji je ispunio jedan od uslova za odlazak u penziju direktor omogući produženje radnog vijeka na određeni period na njegov zahtjev i uz ljekarski pregled. Ovaj prijedlog podržale su i druge policijske agencije na nivou BiH. Trenutno je taj prijedlog u Ministarstvu sigurnosti BiH.

Što se tiče unapređenja policijskih službenika, direktor je istaknuo da to za Agenciju predstavlja veliki problem i da sam proces činovanja urušava međuljudske odnose. Smatraju da bi se pod hitno trebao mijenjati Pravilnik o unapređenju policijskih službenika.

Istaknuo je i da su izmjene i dopune Pravilnika o unutrašnjoj organizaciji i sistematizaciji radnih mjesta, kojim se, između ostalog, predviđa formiranje novog Odjela za terorizam, upućene Vijeću ministara BiH. Također, izmjene Zakona o Državnoj agenciji za istrage i zaštitu su davno upućene prema Vijeću ministara BiH.

Što se tiče izgradnje baze za smještaj i obuku Specijalne jedinice, direktor je istaknuo da je Državna agencija za istrage i zaštitu osigurala sredstva za tu namjenu u iznosu od 8 mil. KM. U proceduri je izgradnja baze na lokaciji Pavlovac, prošla je tenderska procedura. Između ostalog, baza će sadržavati sportsku dvoranu, terene za trčanje, heliodrom... Kada je u pitanju smještaj regionalnog ureda u Tuzli, istaknuli su da je objekat u kojem su bili zajedno s Direkcijom za koordinaciju policijskih tijela BiH u ruševnom stanju te da traže novu lokaciju. Vijeće ministara BiH usvojilo je zaključak kojim bi se išlo u realizaciju trajnog rješavanja smještaja i kupovine objekta.

Na kraju radnog sastanka član Nezavisnog odbora Milan Stanić uputio je sugestiju direktoru Darku Čulumu i njegovim saradnicima da u predstojećem periodu posvete posebnu pažnju ujednačavanju zastupljenosti policijskih službenika u regionalnim uredima Tuzla, Banja Luka i Mostar po nacionalnoj strukturi. Naime, on je naveo da raspolaže saznanjima da nacionalna struktura policijskih službenika u navedenim regionalnim uredima Državne agencije za istrage i zaštitu ne odgovara strukturi koja je u skladu s popisom stanovništva iz 1991. godine, odnosno strukturi koja je bila u vremenu osnivanja tih regionalnih ureda, čime se ozbiljno dovodi u pitanje funkcionalnost jedne državne policijske agencije.

## **POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA**

Najave svih sjednica Nezavisnog odbora se blagovremeno dostavljaju predstavnicima OHR-a i Ambasadi Sjedinjenih Američkih Država u Bosni i Hercegovini čiji su predstavnici prisustvovali većini sjednica Nezavisnog odbora.

Sve sjednice Nezavisnog odbora pratili su i zaposleni u Sektoru za odnose s javnošću Sekretarijata Parlamentarne skupštine BiH. Javnost se može upoznati s radom Nezavisnog odbora i putem akata koje je ovaj odbor usvajao i putem zapisnika, jer su objavljeni na internetskoj stranici Parlamentarne skupštine BiH. Na ovaj način osigurana je transparentnost rada Nezavisnog odbora.

## **POGLAVLJE V. ADMINISTRATIVNO-TEHNIČKA PODRŠKA RADU**

Zajednička služba Sekretarijata Parlamentarne skupštine BiH je, prema Zakonu o nezavisnim i nadzornim tijelima policijske strukture u BiH, zadužena da pruža svu administrativno-tehničku podršku radu Nezavisnom odboru. Zajednička služba osigurala je potrebne uslove za rad Nezavisnog odbora angažiranjem stručnog osoblja, ali i osiguravanjem materijalno-tehničkih i drugih uslova za nesmetan rad.

## **POGLAVLJE VI. PREPORUKE I ZAKLJUČCI**

Nezavisni odbor realizirao je programske aktivnosti planirane u 2025. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2025. godinu.



**PRILOG:** Tabelarni prikaz održanih sjednica i prisustvo članova Nezavisnog odbora u 2025. godini

**TABELARNI PRIKAZ ODRŽANIH SJEDNICA I PRISUSTVA ČLANOVA  
SJEDNICAMA NEZAVISNOG ODBORA ZA 2025. GODINU**

Broj i datum održavanja sjednice	Ime i prezime člana Nezavisnog odbora									
	Enes Obralija	Miše Cavar	Uroš Pena	Enes Bezdrob	Muhamed Mujakić	Mate Miletić	Nikola Džambas	Darكو Kremenović	Milan Stanić	
45. sjednica 28.1.2025.	+	+		+	+	+	+	+		+
46. sjednica 17.2.2025. i 17.3.2025.	+	+		+	+	+	+	+		+
2 hitna sjednica 10.3.2025.	+	+		+	+	+	+	+		+
47. sjednica 15.4.2025.	+	+		+	+	+	+	+		+
48. sjednica 15.4.2025. i 19.5.2025.	+	+		+	+	+	+	+		+
49. sjednica 2.6.2025.	+	+		+	+	+	+	+		+
50. sjednica 3.7.2025.	+	+		+	+	Opravidano odsutan	+	+		+
51. sjednica 25.8.2025.	+	+		+	+	+	+	+		+
52. sjednica 23.9.2025.	+	+		+	+	+	+	+		+
53. sjednica 14.10.2025.	+	+		+	+	+	+	+		+
54. sjednica 18.11.2025.	+	+		+	+	+	+	+		+
55. sjednica 8.12.2025.	+	+		+	+	+	+	+		+